

COMUNICATO n. 3289 del 27/11/2023

Traduzione in cimbrio

Arbatn in da bintar stadjong in Trentino: offe di kandidaturn

Da autonome Provìntz vo Tria lekk vür, vor haür o, a reklâm zo süacha arbatar pinn spruch: “Dar trentinar turismo süachte di” ditza vor da bintar stadjong 2023/2024. ’Z zil iz daz sèll zo macha bokhennen di laüt interesàrt z’arbata in disan sektor pinn sèlln von hotèln boda süachan arbatar.

’Z Ämt vor di Arbat vodar autonome Provìntz vo Tria – pittnândar pitt ASAT, Confesercenti, Confcommercio, Emtar vor in turismo, Cigl, Cisl un Uil – hatt ågeheft auzolesa kandidaturn zo venna laüt boda soìn interesàrt z’arbata untar dar bintar turistìk stadjong 2023/2024 zoa zo machase bokhennen pinn hotèln boda süachan sött arbatar.

Di laüt boda soìn interesàrt mangse kandidàrn vor di arbat boden pazzt pezzar, nâ in sèll bosa hârn getânt sin haüt, un asó khemmensa inngeschribet in di liste turismo, un berda süacht arbatar âzostèlla – pittar hilfe von Ästèllung Zentrum un von feroine vo kategori – mage aunemmen garade vo disarn liste un vorsan laüt qualifikàrt.

Disa inìtziatìf in di djardar izzese gegruntet hërta mearar ankunto o in protokòll boda iz khent untarschribet sa ’z djar 2020 un vornaügart ’z djar 2021. ’Z zil vo disan protokòll iz daz sèll zo macha krescharn di âgestèllte boda arbatn in sektor von turismo opfrante laüt hërta mearar abegeligirnt un boroatet, zoa azta dar turist boda zuarkhint mage lem an esperientz bodar nemear vorgèzst un asó khearn hërta in da ünsar Provìntz auzzomacha di bintar ferie.

Di profiln boma süacht vor disa turistìk stadjong gian von sèlln boda servìrn in di khuchl, âzonemma di laüt, vor in bar, afte piâne sin afte sèlln boda nâstian in wellness.

Bia ma kandidatze:

dar arbatar boda berat interesàrt makse kandidàrn auzvüllante in formulâr, gianante nâ in informatziongen boma vennt afte websait von Ämt vor di Arbat, odar rüavante in Arbat Zentrum, odar in Arbat Ästèllung zo haba hilfe un schütz.

Di kandidaturn bart khemmen gemacht hârn in Feroine vo kategori von turismo un alln in sèlln boda süachan arbatar vor disan sektor, asó makma khemmen gerüaft garade von arbatgebar odar von Ästèllung Zentrum zo redada drau.

Bia ma tüat zo vorsar arbatar:

Di arbatgebar mang vorsan di nem von arbatar boda bölln arbatn in disan sektor durch in Ästèllung Zentrum odar durch di Feroine vodar kategori. Zo bizzasan mearar bia âzovorsar arbatar iz genumma gian afte sait vodar websait von Ämt vor di Arbat, augelekk lai vor ditza.

Hërta nâ in bege z’arbata pittnândar zbisnen Ämt vor di Arbat un Feroine vodar kategori magatz soìn azta khemmen gemacht no ândre prodjèkte un reklâm spetzifige nâ in mångl vo arbatar boda hârn di firme.

Zo haba mearar informatziongen gea z’sega fte sait augelekk lai vor ditza vodar websait von Arbat

Ämt: <https://www.agenzialavoro.tn.it/TESTI-AVVISI/IL-TURISMO-ASSUME>

Übersetzt von Schaltarle vor di zung von Toalkamou vodar Zimbar Hoachebene

(cdt)

